

全上古三代秦漢三國六朝文

全晉文卷一百五十九

烏程嚴

釋氏三

竺僧朗

僧朗京兆人後趙末居太山尋移山西北之金輿谷世稱朗公  
谷前燕慕容儁慕容暉秦苻堅後燕慕容垂南燕慕容德魏道  
武晉孝武皆尊禮之卒年八十五

荅秦主苻堅書

僧朗頓首頓首如來永世道風潛淪忝在出家棲心山嶺精誠微  
薄未能弘匠不悟陛下遠問山川詔命殷勤實感恩氣力虛微  
未堪跋涉願廣開法輪顯保天祚蒙重惠賜卽爲施設福力之功  
無不蒙賴貧道才劣不勝所重僧朗頓首頓首

廣弘明集三十五  
又見十六國春秋

四十

荅晉孝武帝書

僧朗頓首頓首。夫至人無隱德。生爲聖。非德非聖。何敢有喻。忝曰出家。栖息塵表。慕靜山林。心希元寂。靈迹難逮。形累而已。奉被詔命。慰及應否。大晉重基。先承孝治。惠同天地。覆養無邊。願開大乘。申揚道味。僧朗頓首頓首。廣弘明集三十五

荅燕主慕容垂書

僧朗頓首頓首。能仁御世。英規遐邇。光敷道化。融濟四海。貧道忝服道味。習敎山林。豈惟詔旨。諮及國難。王者膺期。統有六合。大能并小。自是常倫。若蔡藿之傾太陽。飛步之宗麟鳳。皇澤載融。羣生繫仰。陛下高明。何思不服。貧道窮林。蒙賜過分。僧朗頓首。廣弘明集三十五

荅南燕主慕容德書

僧朗頓首。陛下龍飛。統御百國。天地融流。皇澤載賴。善逢高鑒。東

濟黔首、蕩平之期、何憂不一、陛下信向三寶、恩旨殊隆、貧道味靜  
深山、豈臨此位、且領民戶、興造靈祠、所崇像福、冥報有所、歸僧則  
頓首頓首、隋明集三十五又見十六國春秋六十三

又報南燕主慕容德

山野絕俗之士、不應預聞朝議、但有待之累、非有託無已立、陛下  
今卽問之、檀越敬覽三策、潘尚書之議、可謂興邦之策矣、且今歲  
之初、彗星起於奎婁、遂歸虛危、彗者除舊更新之象、奎婁爲魯之  
分野、虛危爲齊之分野、宜先定兗州、巡撫琅邪、待秋風扇節、然後  
北轉臨齊、此天道也、十六國春秋

竺法曠

法曠、俗姓皋、下邳人、寓居吳興、後爲僧、歷穆帝至安帝時卒、

替簡文帝詔書

昔宋景修福、妖星移次、陛下光輔已來、政刑允贍、天下任重、萬機

事殷失之毫釐差目千里唯當勤修德政日賽天譴貧道必當盡

誠上荅正恐有心無力耳

高僧傳五

竺法汰

法汰東莞人少與道安同學太元中終瓦官寺

與釋道安書追論竺僧敷

每憶敷上人周旋如昨逝波奄復多年與其清談之日未嘗不相

憶思得與君共覆疏其美豈圖一旦永為異世痛恨之深何能忘

情其義理所得披尋之功信難可圖矣

高僧傳

比丘尼戒本所出本末序

拘夷國寺甚多修飾至麗王宮彫鏤立佛形像與寺無異有寺名

達慕藍百七北山寺名致隸藍六十劔慕王新藍五十溫宿王藍

七十右四寺佛圖舌彌所統寺僧皆三月一易屋牀坐或易藍者

未滿五臘一宿不得無依止王新僧伽藍九十僧有年少沙門字

鳩摩羅乃才大高明大

乘學與舌彌是師徒  
而舌彌阿舍學也  
阿麗藍百八十輪若干藍五十比阿麗跋藍  
尼道右三寺比丘尼統依舌彌受法戒比丘尼外國法不得獨立  
也此三寺尼多是慈嶺呂東王侯婦女爲道遠集斯寺用法自整  
大有檢制亦三月一易房或易寺出行非大尼三人行多持五  
百戒亦無師一宿者輒彈之今所出比丘尼大戒本此寺常用  
者也舌彌乃不肯令此戒來東僧純等求之至勤每嗟此後出法  
整唯乏斯戒末乃得之其解色已息姪不在止治容也不欲已止  
竊不在謹封藏也解色則無情於外形何計飾容與不飾乎不欲  
則無心於珠玉何須慢藏與緘膝乎所謂無關而不可開無約而  
不可解也內健旣爾外又毀容羈服進退中規非法不視非時不  
飡形如朽柱心若溼灰斯戒之謂也豈非聖人善救人故無棄人  
也哉然女人之心弱而多放佛達其微防之宜密是故立戒每倍  
於男也大法流此五百餘年比丘尼大戒了於其文已此推之外

國道士亦難斯人也。法汰頃年鄧當世爲人師處一大域而坐視令無一部僧法推求出之竟不能具。吾昔得大露精比丘尼戒而錯得其藥方一匣持之自隨二十餘年無人傳譯近欲參出殊非尼戒方知不相關通至於此也。賴僧純於拘夷國來得此戒本令佛念星摩侍慧常傳始得具斯一部法矣。然弘之由人不知斯人等能遵行之不耳。釋藏百一

竺道壹

道壹俗姓陸吳人廢帝時居瓦官寺孝武時會稽守王贊爲起嘉祥寺後還吳隆安中卒葬虎丘山南

谷丹陽尹

蓋聞大道之行嘉遁得肆其志唐虞之盛逸民不奪其性弘方由於有外致遠待而不踐大晉光熙德被無外崇禮佛法弘長彌大是已殊域之人不遠萬里被褐振錫洋溢天邑皆割愛棄欲洗心

清玄遐朗曠世故道深常隱志存慈救故遊不滯方自東徂西唯道是務雖萬物惑其日計而識者悟其歲功今若責其屬籍同役編戶恐遊方之士望崖於聖世輕舉之徒卓長往而不反虧盛明之風有謬主相之旨且荒服之賓無關天臺幽謁之人不書王府幸曰時審識詳而後集也

高僧傳五

竺曇無蘭

曇無蘭天竺人太元中居揚都謝鎮西寺

三十七品經序

三十七品者三世諸佛之舟輿聲聞支佛亦皆乘之而得度三界眾生靡不載之故經曰大乘道之輿一切度天人然則三十七品或離或合在一增四法而有四意止四神足無四意斷五法則有五根五力七法無七覺意八法而有八等則爲五經也依如此比當應爲七經如此則離也而諸經多合唯一增余耳中阿含身意



止有安般出入息事。將足行四意止。時有亂意起者。執對行藥也。又諸經三十七品文辭不同。余因閑戲。尋省諸經。撮采事備辭巧便者。差次條貫。伏其位。使經體不毀。而事有異同者。得顯於義。又曰三三昧連之乎末。曰具泥洹四十品。五根中云。四禪四誦。有目無文。故復屬之於後。令始涉者。覽之易悟。不亦佳乎。又曰諸經之異者。注于句末也。小安般三十七品。後則次止觀律法義決。三十七品。後次四諦。小十二門。後次三向。余爲泥洹四十品。止觀四誦。成道之行。不可曰相無也。是故集止觀三三昧四禪四誦。繫之於三十七品。後欲令行者。覽之易見。而具行也。序二百六十五字。本二千六百八十五字。予二千九百七十字。凡五千九百二十字。除後六行八十字不在計中。晉泰元二十一年。歲在丙申六月。沙門竺曇無闍在揚州謝鎮西寺撰。釋藏  
計

大比丘二百六十戒三部合異序

夫戒者人天所由生三乘所由成泥洹之關要也是已世尊授藥  
已戒爲先焉戒者乃三藏之一也若不已戒自禁馳心於六境而  
欲望免於三惡道者其猶如無舟而求度巨海乎亦如魚出於深  
淵鴻毛入於盛火怖不死焦者未之有也行者已戒自嚴猛意五  
十八法者取道也何難哉蘭自染化務已戒律爲意昔在於廬山  
中竺僧舒許得戒一部持之自隨近二十年每一尋省恨文質重  
會雲摩侍所出戒規矩與同然侍戒眾多施有百一十事余爲戒  
有二百六十也釋法師問侍侍言我從持律許口受一一記之莫  
知其故也尼戒眾多施亦尔百有一十三事中第二十一二百  
五十者云長鉢過十日舍墮續言是比丘當持此鉢與比丘僧二  
十二二百六十者云鉢破綴齊五更未得新鉢故者當歸眾僧推  
其理旨宜如二百五十者在長鉢後事與破鉢并者爲重長也余  
已長鉢後事注於破鉢下已子從母故也九十事中多參錯事不

相對復徒就二百六十者令事類相對亦時有不相似者重飯食無餘因緣墮應對重飯不屬人言不足此除因緣事與別請并故曰對別請此一戒在重飯一戒在別請亦爲有餘緣則得重飯亦得越次受請也不舒手受食自恐教人恐怖此二戒無對將傳寫脫邪梵本闕乎眾多施亦有不相對不相似者莫知所已也余因閑暇爲之三部合異粗斷起盡曰二百六十戒爲本二百五十者爲子目前出常行戒全句繫之於事末而亦有永乖不相似者有曰一爲二者有曰三爲一者余復分合令事相從然此三戒或能分句失旨賢才聰敏若有攬者加思爲定恕余不逮

釋藏  
百一

### 千佛名號序

賢劫經說二千一百諸度無極竟喜王菩薩仍問今此會中寧有大士得此定竟大斯八千四百諸度無極及八萬四千度無極法入八萬四千諸三昧門乎佛答言有不但此諸問士也當來賢劫

一千如來亦得入也。除四正覺喜王白佛唯願世尊說諸佛名字。姓號佛爲喜王。說諸佛號字。號字一千。數之有長。而興立發意二品重說。皆齊慧業而止。曰此二品檢之。有曰二字爲名者。三字名者。有曰他字足成音句。非其名號。亦時有字支異者。想梵本一耳。將是出經人轉其音辭。令有左右也。長而有者。或當曰四五六字爲名號也。興立發意。不盡名。自慧業曰下。難可詳也。余今別有可了。各爲佛名。意所不了。則全舉之。又曰字異者。注之於下。然或能分合失所。深見達士。其有覺省。可爲改定。恕余不逮。釋藏一百一

### 帛道猷

道猷俗姓馮山陰人居若邪溪終虎丘

### 與竺道壹書

始得優遊山林之下。縱心孔釋之書。觸興爲詩。陵峯採藥。服餌獨癖。樂有餘也。但不與足下同日。曰此爲恨耳。因有詩曰。連峯數千

里修林帶平陰雲過遠山驛風至梗荒榛茅茨隱不見雞鳴知有人閒步踐其徑處處見遺薪始知百代下故有上皇民高僧傳五

趙正

正一名整字文業洛陽清水人或曰濟陰人仕苻堅爲著作郎遷黃門侍郎武威太守堅敗後爲僧更名道整終於襄陽

出家更名頌

佛生何已晚泥洹一何早歸命釋伽文今來投大道高僧傳一

竺佛念

佛念涼州人

阿育王子法益壞目因緣經序

原夫善惡之運契猶形影之相顧受對朗驗凡三差焉現也中也後也播九色之深恩目悅天妃之耳目孤禽投王而全命形受五机一作之切醢斯現報也羣徒濟淪於幽壑神陟輪飄一作漂而不

改身酸歷世之殃毀不曉王子之喪口斯中報也阿蘭縱禍於無  
想嬰佩惑於始終終爲著翅之暴軀飛沈受困而難計斯後報  
也故聖人降靈必有所由非務不撓一作清白明矣玄墜三世弱  
喪之流深記來變坏形之累趣使引入百練之室自如來逝後阿  
育登位網維閭浮光被六合圖形神寺八萬四千羅漢御世汎濟  
億數國主師宗玄化湧流萬民仰戴而不已神祇欽賴而愈深然  
王子法益宿植洪業生在王宮容貌殊特後復受對一無後字作復受此對  
靡知緣起會秦尙書令輔國將軍宗正卿領城門校尉使者司隸  
校尉姚昱者南安郡人也親姚韶之次兄字景疑文爲儒表則烈  
勳干載武爲邈羣則皎然而獨標亢音通實則辨機而曠遠執素  
縱情則翱翔而無倫德也純懿範也難模赫逸翰於羣才振龍威  
於昆鋒然照永感之叵救傷愚黨之不寤欲紹先勝之遺迹豎玄  
宗於末俗故請天竺沙門曇摩難提出斯緣本秦建初六年歲在

辛卯於安定城二

一作三

月十八日出至二十五日乃訖梵本三百

四十三首廬傳爲漢文一萬八百八十言

一作一萬八千言

佛念譯音情

義實難或離文而就義或正滯而徧通或取解於誦人或事略而曲備冀將來之學士令監罪福之不朽設有毫釐潤色者盡銘之於頡兆故敘之焉

釋藏所又跡七

釋道慈

道慈豫章人太元中居廬山後入京師

中阿含經序

中阿含經記云昔釋法師於長安出中阿含增一阿毗曇廣說僧伽羅叉阿毗曇心婆須密三法度二眾從解脫緣此諸經律凡百餘萬言竝違本失旨名不當實依怙屬辭句味亦差良由譯人造次未善晉言故使爾耳會燕秦交戰關中大亂於是良匠背世故呂弗獲改正乃經數年至關東小流冀州道人釋法和尉賓沙門

僧伽提和招集門徒但遊洛邑四五年中研講遂精其人漸曉漢語然後乃知先之失也於是和乃追恨先失卽從提和更出阿毗曇及廣說也自是之後此諸經律漸皆譯正唯中阿含僧伽羅叉婆須蜜從解脫緣末更出耳會僧伽提和進遊京師應運流化法施江左於是晉國大長者尙書令衛將軍東亭侯優婆塞王元琳當護持正法曰爲己任卽檀越也爲出經故造立精舍延請有道釋慧持等義學沙門四十許人於諸所安四事無乏又預請經師僧伽羅叉長供數年然後乃曰晉隆安元年丁酉之歲十一月十日於揚州丹陽郡建康縣界在其精舍更出此中阿含請屬賓沙門僧伽羅叉合講梵本請僧伽提和轉梵爲晉豫州沙門道慈筆受吳國李寶唐化共書至來二年戊戌之歲六月二十五日草本始訖此中阿含凡有五誦都十八品有二百二十二經合五十一萬四千八百二十五字分爲六十卷時遇國大難未卽正書乃至



五年辛丑之歲方得正寫校定流傳其人傳譯準之先出大有不同於此二百二十二經中若委靡順從則懼失聖旨若從本制名類多異舊則逆忤先習不協眾懷是已其人不得自專時有改本從舊名耳然五部異同孰知其正而道慈愚意使使於遠本故諸改名者皆鈔出注下新舊兩存別爲一卷與目錄相連以示於後將來諸賢令知同異得更采訪脫遇高明外國善晉梵方言者訪其得失刊之從正

釋藏  
跡九

賜進士出身二品銜廣東學處提刑按察使司按察使兼管驛傳事務萬國王毓藻校刊

全晉文卷一百五十九終

全晉文卷一百六十

烏程嚴可均校輯

釋氏四

釋僧叡

叙魏郡長樂人師事道安

大品經序

摩訶般若波羅蜜者出八地之由路登十階之龍津也夫淵府不足曰盡其深美故寄大曰目之水鏡未可曰喻其澄朗故假慧曰稱之造盡不足曰得其涯極故借度曰明之然則功訖有無度名所曰立照本靜末慧曰之生曠兼無外大稱由曰起斯三名者雖義涉有流而詣得非心跡寄有用而功實非待非心故曰不住爲宗非待故曰無照爲本本曰無照則凝知於化始宗曰非心則忘功於行地故啟章玄門曰不住爲始妙歸三慧曰無待爲終假

號照其真應行顯其明無生沖其用功德旌其深大明要終曰驗  
始漚和卽始曰悟終蕩蕩焉真可謂大業者之通塗畢佛乘者之  
要軌也夫寶重故防深功高故校廣囑累之所曰殷勤功德之所  
曰履增良有曰也而經來茲土乃曰秦言譯之典謨乖於殊制名  
實喪於不謹致使求之彌至而失之彌遠頓轡重阻而窮路轉廣  
不遇淵匠殆將墜矣亡師安和尚鑿荒塗曰開轍標玄指於性空  
落乖蹤而直達殆不曰謬文爲闕也壺壺之功思過其半邁之遠  
矣鳩摩羅什法師慧心夙悟超拔特詣天魔干而不能迴淵識難  
而不能屈扇龍樹之遺風震慧響於此世秦王感其來儀時運開  
其凝滯曰弘始三年歲次星紀冬十二月二十日至長安秦王扣  
其虛闕匠伯陶其淵致虛闕旣開乃正此文言淵致旣宣而出其  
釋論渭濱流祇洹之化西明啟如來之心逍遙集德義之僧京城  
溢道詠之音末法中興將始於此乎予旣知命遇此真化敢竭微

誠屬當譯任執筆之際三推亡師五失及三不易之誨則憂懼交  
懷惕焉若厲雖復履薄臨深未足喻也幸冀宗匠通鑒文雖左右  
而旨不違中遂謹受案譯敢當此任已弘始五年歲在癸卯四月  
二十三日於京城之北逍遙園中出此經法師手執梵本口宣秦  
言兩釋異音交辯文旨秦王躬覽舊經驗其得失諮其通途坦其  
宗致與諸宿舊義業沙門釋慧恭僧侶僧遷遷度慧精法欽道流  
僧叡道恢道標道恆道棕等五百餘人詳其義旨審其文中然後  
書之已其年十二月十五日出盡校正檢括明年四月二十三日  
乃訖文雖粗定已釋論檢之猶多不盡是已隨出其論隨而正之  
釋論既訖爾乃文定定之未已已有寫而傳者又有已意增損私  
已般若波羅蜜爲題者致使文言舛錯前後不同良由後生虛已  
懷薄信我情篤故也梵本唯序品阿鞞跋致品魔事品有名餘者  
直第其品數而已法師已名非佛制唯存序品略其二目其事數

之名與舊不同者皆是法師曰義正之者也如陰人持筭名與義乖故隨義改之陰爲眾入爲處持爲性解脫爲皆捨除入爲勝處意止爲念處意斷爲正勤覺意爲菩提直行爲聖道諸如此比改之甚眾梵音失者正之曰天竺秦言謬者定之曰字義不可變者卽而書之是曰異名斌然梵音殆半斯實匠者之公謹筆受之重愼也幸冀遵實崇本之賢推而體之不曰文樸見咎煩異見情也

釋教  
跡人

### 小品經序

般若波羅蜜者窮理盡性之格言菩薩成佛之弘軌也軌不弘則不足曰異羣異一指歸性不盡則物何曰登道場成正覺正覺之所曰成羣異之所曰一何莫由斯道也是曰累敬殷勤三撫曰之頻發功德是校九增曰之屢至如問相標玄而玄其玄幻品忘寄而忘其忘道行坦其津難問窮其源隨喜忘趣曰要終照明不化

以卽立章雖三十貫之哲道言雖十萬倍一作之者行行凝然後

無生道足然後補處乃一作及此而變一切智也法華鏡本曰凝照

般若冥末曰解懸解懸理趣菩薩道也凝照鏡末告其終也終而

不泯則歸途扶疏有三寶之迹權應不夷則亂緒紛紛有惑趣之

異是曰法華般若相待曰期終方便實化冥一曰俟二作盡論其

窮理盡性夷明萬行則實不如照取其大明真化解本無三則照

不如實是故歎深則般若之功重美實則法華之用微此經之尊

三撫三囑未足惑也有秦太子者寓跡儲宮擬韻區外翫味斯經

夢想增至準悟大品深知譯者之失會聞鳩摩摩羅法師神授其文

真本猶存曰弘始十年二月六日請令出之至四月三十日校正

都訖攷之舊譯真若荒田之稼芸過其半未詎多也斯經正文凡

有四種是佛異時適化廣略之說也其多者云有十萬偈少者六

百偈此之大品乃是天竺之中品也隨宜之言復何必計其多少

議其煩簡邪梵文雅質案本譯之於麗巧不足撰正有餘矣幸費  
文悟之賢略其華而幾其實也

釋藏麟一  
又跡八

### 法華經後序

法華經者諸佛之祕藏眾經之實體也。已華爲名者照其本也。稱  
分陀利者美其盛也。所興既玄其旨甚婉。自非達識傳之罕有得  
其門者。夫百卉藥木之英萬物實之本也。八萬四千法藏者道果  
之源也。故曰喻焉。諸華之中蓮華最勝。華而未敷名屈摩羅敷。而  
將落名迦摩羅。處中盛時名分陀利。未敷喻二道將落譬泥洹。榮  
曜獨足。曰喻斯典。至如般若諸經深無不極。故道者曰之而歸。大  
無不該。故乘者曰之而濟。然其大略皆曰適化爲本。應務之門不  
得不曰善權爲用。權之爲化悟物雖必於實體不足皆屬法華。固  
其宜矣。尋其幽旨恢廓宏遠。所該甚遠。豈徒說實歸本。畢定殊途  
而已邪。乃實大明覺理。囊括古今。云佛壽無量。永劫未足。曰明其

久也。分身無數萬形不足目異其體也。然則壽量定其非數。分身明其無實。皆賢顯其無成。多寶昭其不滅。夫邁玄古。已期今。則萬世同一日。即百化。已悟玄。則千途無異轍。夫如是者。則生生未足。已言其在。永寂亦未可言其滅矣。尋幽宗。已絕往。則喪功於本無。控心轡於三昧。則忘期於二地。經流茲土。雖復垂及百年。譯者昧其虛津。靈關莫之或啟。談者乖其準格。幽跡罕得而履。徒復搜研皓首。竝未有窺其門者。秦司隸校尉左將軍安城侯姚嵩。擬韻玄門宅心世表。注誡斯典。信詣彌至。每思尋其文。深識譯者之失。既遇鳩摩羅法師爲之傳寫。指其大歸。真若披重霄而高蹈。登崑崙而俯眇矣。於時聽受領悟之僧八百餘人。皆是諸方英秀。一時之傑也。是歲弘始八年。歲次鶡火。釋藏跡八

思益經序

此經天竺正音名毗訶沙真諦。是他方梵天殊特妙意菩薩之號。



也詳聽什公傳譯其名翻覆展轉意似未盡良由未備秦言名實之變故也察其語意會其名宜當是持意非思益也直曰未喻持義遂用益耳其言益者超絕殊異妙拔之稱也思者進業高勝自強不息之名也舊名持心最得其實又其義旨舊名等御諸法梵天坦其津塗世尊照其所明普華獎其非心文殊泯已無生落落焉真可謂法輪再轉於閭浮法鼓重聲於宇內甘露流津於季末靈液沾潤於遐裔者矣而恭明前譯頗麗其辭仍迷其旨是使宏標乖於謬文至味淡於華豔雖復研尋彌稔而幽旨莫啟幸遇鳩摩羅什法師於關右既得更譯梵音正文言於竹帛又蒙披釋玄旨曉大歸於句下於時豁悟之侶二千餘人大齋法集之眾欣豫難遭之慶近是講肄之來未有其比於時余與道恆謬當傳寫之任輒復疏其言記其事曰論後來之賢豈期必勝其辭必盡其意邪庶已所錄之言粗可髣髴其心耳不同時事之賢儼欲全見其

高座所說之旨故具載於文不自加其意也

釋藏  
第八

毗摩羅詰提經義疏序

此經曰毗摩羅詰所說爲名者尊其人重其法也五百應真之所稱述一切菩薩之所歎伏文殊師利對揚之所明答皆現色身之要言皆其說也借座於燈王致飯於香積接大眾於右掌內妙樂於忍界阿難之所絕塵皆其不可思議也高格邁於十地故彌勒屈之而虛已崇壙超於學境故文殊已還竝未有關其庭者法言恢廓指玄門曰忘期觀品夷照總化本目冥想落落焉聲法鼓於維邪而十方世界無不悟其希音恢恢焉感諸佛於一室而恆沙正覺無不應其虛求予始發心啟蒙於此諷詠研求曰爲候襟粟玄指於先匠亦復未識其絕往之通塞也既蒙鳩摩羅什法師正玄文摘幽指始悟前譯之傷本謬文之乖趣耳至如曰不來相爲尋來不見相爲相見未緣法爲始祖緣合法爲止心諸如此比無

品不有無章不爾然後知邊情險誠難可已參契眞言廟懷玄悟  
矣自慧風東扇法言統詠已來雖日講肄格義迂而乖本六家偏  
而不卽性空之宗旨今驗之最得其實然鑪冶之功微恨不盡當  
是無法可尋非尋之不得也何已知之此土先出諸經於識神性  
空明言處少存神之文其處甚多中百二論文未及此又無通鑒  
誰與正之先匠所曰輟章於遐慨思決言於彌勒者良在此也自  
提婆已前天竺義學之僧竝無來者於今始聞宏宗高唱敢預希  
味之流無不竭其聰而注其心然領受之用易存意識之功難掌  
自非般若朗其間慧總持銘其思庶焉能使機過而不遺神會而  
不昧者哉故因紙墨日記其文外之言借眾聽目集其成事之說  
煩而不簡者貴其事也質而不麗者重其意也其指微而婉其辭  
博而晦自非筆受胡可勝哉是日卽於講次疏曰爲記冀通方之  
賢不咎其煩而不要也

釋藏  
跡八

自在王經後序

此經曰菩薩名號爲題者蓋是思益無盡意密迹諸經之流也已其圓用無方故名自在勢無與等故稱爲王標準宏廓固非思之所及幽旨玄凝尋者莫之髣髴此土先出方等諸經皆是菩薩道行之式也般若指其虛標勇伏明其必制法華泯一眾流大哀旌其拯濟雖各有其美而未備此之所載秦大將軍尙書令常山公姚顯其懷簡到徹悟轉詣聞其名而悅之攷其旨而虛襟思弘斯化廣其流津曰爲斯文旣布便若菩薩常住不去此世奔誠發自大心欣躍不能自替遂請鳩摩羅法師譯而出之得此二卷於菩薩希蹤卓犖之事朗然昭列矣是歲弘始九年歲次鶡首

釋藏第八

關中出禪經序

禪法者向道之初門泥洹之津徑也此土先出修行大小十二門大小安般雖是其事旣不根悉又無受法學者之戒蓋闕如也鳩

摩羅法師曰辛丑之年十二月二十日自姑臧至長安予卽日其  
月二十六日從受禪法旣蒙啟授乃知學準法有成修首楞嚴經  
云人在山中學道無師道終不成是其事也尋蒙鈔撰眾家禪要  
得此三卷初四十三偈是鳩摩羅羅陀法師所造後二十偈是馬  
鳴菩薩之所造也其中五門是婆須蜜僧伽羅叉溫波囉僧伽斯  
那勒比丘馬鳴羅陀禪要之中鈔集之所出也六覺中偈是馬鳴  
菩薩修習之目釋六覺也初觀婬恚癡相及其三門皆僧伽羅叉  
之所撰也息門六事諸論師說也菩薩習禪法中後更依持世經  
益十二因緣一卷要解二卷別時撰出夫馳心縱想則情愈滯而  
惑愈深繫意念明則澄鑒朗照而造極彌密心如水火擁之聚之  
則其用彌全使之散之則其勢彌薄故論云質微則勢重質重則  
勢微如地質重故勢不如水水性重故力不如火火不如風風不  
如心心無形故力無上神通變化入不思議心之力也心力旣全

乃能轉昏入明。明雖愈於不明。而明未全也。明全在於忘照。照忘然後無明。非明無明。非明爾。乃幾乎息矣。幾乎息矣。慧之功也。故經云。無禪不智。無知不禪。然則禪非智不照。智非禪不成。大哉禪智之業。可不務乎。出此經後。至弘始九年閏月五日。重求檢校。懼初受之不審。差之一豪。將有千里之降。詳而定之。輒復多有。所正既備。無間然矣。釋藏

大智度論序

一作大智  
釋論序

夫萬有本於生生。而生生者無生。變化兆於物始。而始始者無始。然則無生無始。物之性也。生始不動於性。而萬有陳於外。悔吝生於內者。其唯邪思乎。正覺有已見邪思之自起。故阿含爲之作。知滯有之由惑。故般若爲之照。然而照本希夷。津涯浩汗。理超文表。趣絕思境。曰言求之則乖其深。曰智測之則失其旨。二乘所曰顛沛於三藏。新學所曰曝鱗於龍門者。不其然乎。是曰馬鳴起於正

法之餘龍樹生於像法之末正餘易弘故直振其遺風瑩拂而已  
像末多端故乃寄跡凡夫示悟物曰漸又假照龍宮曰朗搜玄之  
慧託聞幽秘曰窮微言之妙爾乃憲章智典作茲釋論其開夷路  
也則令大乘之駕方軌而直入其辯實相也則使妄見之惑不遠  
而自復其爲論也初辭擬之必標眾異曰盡美卒成之終則舉無  
執曰盡善釋所不盡則立論曰明之論其未辯則寄折中曰定之  
使靈篇無難喻之章千載悟作者之旨信若人之功矣有鳩摩羅  
耆婆法師者少播聰明之聞長集奇拔之舉才舉則亢標萬里言  
發則英辯榮枯常杖茲論焉淵鏡憑高致曰明宗曰秦弘始三年  
歲次星紀十二月二十日自姑臧至長安秦王虛襟旣已蘊在昔  
見之心豈徒則悅而已晤言相對則淹留終日研微造盡則窮年  
忘倦又曰晤言之功雖深而恨獨得之心不曠造盡之要雖玄而  
惜津梁之勢未替遂曰莫逆之懷相與弘兼忘之惠乃集京師義

業沙門命公卿賞契之士五百餘人集於渭濱逍遙闢堂鸞輿停  
駕於洪溪禁樂息警於林間躬覽玄章攷正名於梵本諮通津要  
坦夷路於來蹤經本既定乃出此釋論論之略本有十萬偈偈有  
三十二字并三百二十萬言梵夏旣乖又有煩簡之異三分除二  
得此百卷於大智三十萬言玄章婉旨朗然可見歸途直達無復  
惑趣之疑曰文求之無間然矣故天竺傳云像正之末微馬鳴龍  
樹道學之門其淪胥溺喪矣其故何邪寶由二未契微邪法用盛  
虛言與實教並興嶮徑與夷路爭轍始進者化之而流離向道者  
惑之而播越非二匠其孰與正之是曰天竺諸國爲之立廟宗之  
若佛又稱而詠之曰智慧曰目犍斯人合再曜世昏寢已久斯人  
悟合覺若然者眞可謂功格十地道作補處者矣傳而稱之不亦  
宜乎幸哉此中鄙之外忽得全有此論梵文委曲皆如初品法師  
曰秦人好簡故裁而略之若備譯其文將近千有餘卷法師於秦



語大格唯譯一往方言殊好猶隔而未通苟言不相喻則情無由比不比之情則不可已託悟懷於文表不喻之言亦何得委殊塗於一致理固然矣進欲停筆爭是則交競終日卒無所成退欲簡而使之則負傷於一作傷手穿鑿之譏已二三唯案譯而書都不備飾幸冀明悟之賢略其文而挹其玄也釋藏友一又跡十

中論序

中論有五百偈龍樹菩薩之所造也。已中爲名者照其實也。已論爲稱者盡其言也。實非名不悟故寄中已宣之言非釋不盡故假論已明之其實既宣其言既明於菩薩之行道場之照朗然懸解矣。夫滯惑生於倒見三界已之而淪溺偏悟起於默智耿介已之而致乖故知大覺在乎曠照小智纏乎隘心照之不曠則不足已夷有無一道俗知之不盡則未可已涉中途泯二際道俗之不夷二際之不泯菩薩之憂也是已龍樹大士折之已中道使感趣之

徒望玄指而一變括之情之作曰卽化令玄悟之賓喪諮詢於朝徹  
蕩蕩焉真可謂理夷路於冲階敞玄門於宇內扇慧風於陳校流  
甘露於枯悴者矣夫百梁之構興則鄙茅茨之仄陋觀斯論之宏  
曠則知偏悟之鄙倍幸哉此區之赤縣忽得移靈鷲曰作鎮險陬  
之邊情乃蒙流光之餘惠而今而後談道之賢始可與論實矣云  
天竺諸國故豫學者之流無不翫味斯論曰爲喉衿其染翰申釋  
者甚亦不少所出者是天竺梵志名賓羅伽秦言青目之所釋也  
其人雖信解深法而辭不雅中其中乖闕煩重者法師皆裁而裨  
之於經通之理盡矣文或左右未盡善也百論治外曰閑邪斯文  
祇內曰流滯大智釋論之淵博十二門觀之精誼尋斯四者真若  
日月入懷無不朗然鑒徹矣予徯之味之不能釋手遂復忘其鄙  
拙託悟懷於一序并目品義題之於首豈期能釋邪蓋是欣自同  
之懷耳

釋藏神七  
又百一

十二門論序

十二門論者蓋是實相之折中道場之要軌也十二者總眾枝之大數也門者開通無滯之稱也論之者欲曰窮其源盡其理也若一理之不盡則眾異紛然有惑趣之乖一源之不窮則眾塗扶疏有殊致之迹殊致之不夷乖趣之不限大士之憂也是曰龍樹菩薩開出者之由路作十二門曰正之正之曰十二則有無兼暢事無不盡事盡於有無則忘功於造化理極於虛位則喪我於二際然則喪我在乎落筌筌忘存乎遺寄筌我兼忘始可曰幾乎實矣幾乎實矣則虛實兩翼得失無際冥而無際則能忘造次於兩玄泯頭沛於一致整歸駕於道場畢趣心於佛地恢恢焉真可謂運虛刃於無間奏希聲於宇內濟濟喪於玄津出有無於域外者矣遇哉後之學者夷路既坦幽關既開真得振和鸞於北溟馳白牛曰南迴悟大覺於夢境即百化已安歸夫如是者惡復知曜靈之

方盛玄陸之木喻也哉。微旨鄙倍之淺識。猶敢明誠虛關。愉懷宗  
極。庶日用之有宜。冀歲計之能植。況才之美者乎。不勝景仰之至。  
敢曰鈍辭短思。序而申之。并曰品義題之於首。豈期能益。孤庶曰  
此心間自進。一作庶曰此微開疾進之路下。釋藏守六

### 出曜經序

出曜經者。婆須蜜舅法救菩薩之所撰也。集此一千章。立爲三十  
三品。名曰法句錄。其本起。繫而爲釋。名曰出曜。出曜之言。舊名譬  
喻。卽十二部經第六部也。有罽賓沙門僧伽跋澄。自前秦建元十  
九年。陟葱嶺。涉流沙。不遠萬里。來至長安。其所闇識。富博絕倫。先  
師器之。旣重其人。吐誠亦深。數四年中。上聞異要。奇雜盈耳。俄而  
三秦覆墜。避地東周。後秦皇初四年。還轅伊洛。將返舊鄉。佇駕京  
師。望路致慨。恨法句之不全。出曜之未具。緬邈長懷。蘊情盈抱。太  
尉姚弋。篤誠深樂。聞不俟駕。五年秋。請令出之。六年春。訖。澄執梵

本佛念宣譯道疑筆受和習二師師法括而正之時有不怙從本而已舊有四卷所益已多得此具解覽之書然矣予自武當軒衿華領諮詢觀化預參檢校聊復序之弘始元年八月十二日寫訖僧叙造首釋藏定一

賜進士出身三品銜廣東等處提刑按察使司按察使兼管驛傳事務黃岡王毓藻校刊

全晉文卷一百六十一

烏程嚴可均校輯

釋氏

釋慧遠

慧遠俗姓賈雁門樓煩人慕容雋時師事道安後隨道安奔襄陽孝武初襄陽陷移居廬山江州刺史桓伊爲起東林寺至義熙十二年卒年八十三有集十二卷

荅秦主姚興書

欲令作大智論序曰伸作者之意貧道聞懷大非小堵所容汲深非短綆所測披省之日有愧高命又體羸多疾觸事有廢不復屬意自來其日亦久來告之重輒粗輟所懷至於研究之美當復寄諸明德

釋藏第九  
又百五

荅王謚書

古人不愛尺璧而重寸陰觀其所存似不在長年耳檀越既履順而游性乘佛理旨御心因此而推復何羨於遐齡邪聊想斯理久已得之爲復酬來訊耳

釋戴處士書  
百五又世說

答戴處士書

釋慧遠頓首省君別示旨爲慨然先雖未善相悉人物來往亦未始暫忘分明窮達非常智所測然依傍大宗似有定檢去秋與諸人共讀君論竝亦有同異觀周郎所作荅意謂世典與佛教粗是其中今封呈想暇日能力尋省

廣弘明  
集二十

又與戴處士書

見君與周處士往復足爲賓主然佛教精微雖已事諒至於理玄數義義隱於經者不可服言但恨君作佛弟子未能留心聖典耳頃得書論亦未始暫忘年衰多疾不暇有荅脫因講席之餘粗綴所懷今寄往試與同疑者共尋若見其族則比于商臣之流可不

思而得釋慧遠頓首

廣弘明集卷二十一

與隱士劉遺民等書

每尋疇昔遊心世典。已爲當年之華苑也。及見老莊。便悟名教。是應變之虛談耳。已今而觀。則知沈冥之趣。豈得不已。佛理爲先。苟會之有宗。則百家同致。君諸人竝爲如來賢弟子也。策名神府。爲日已久。徒積懷遠之興。而乏因藉之資。已此永年。豈所已願其宿心哉。意謂六齋日。宜簡絕常務。專心空門。然後津寄之情。篤來生之計深矣。若梁翰綴文。可託興於此。雖言生於不足。然非言無已。曷一詣之感。因驥之喻。亦何必遠寄古人。

廣弘明集卷三十二

遺書通好鳩摩羅什

釋慧遠頓首。去歲得姚左軍書。具承德問。仁者曩絕殊域。越自外境。於時音譯未交。間風而悅。但江湖難寘。已形乖爲歎耳。須知承名通之會。懷寶來遊。至止有間。則一日九馳。徒情欣雅味。而無由



造盡、寓目望途、固已增其勞佇、每欣大法宣流、三方同遇、雖運鍾其末、而趣均在昔、誠未能扣律妙門、感徹遺靈、至於虛襟遺契、亦無日不懷、夫旃檀移植、則異物同熏、摩尼吐曜、則眾珍自積、是惟敎合之道、猶虛往實歸、況宗一無像、而應不己、情者乎、是故負荷大法者、必己無執爲心、會友己仁者、使功不自己、□若令法輪不停軫於八正之路、三寶不輟音於將盡之期、則滿願不專美於絕代、龍樹豈獨善於前蹤、今往比量衣教、願登高坐爲著之、并天濉之器、此旣法物、聊曰示懷、高僧傳六

重與鳩摩羅什書

日有涼氣、比復何如、去月法識道人至、聞君欲還本國、情已悵然、先聞君方當大出諸經、故未欲便相諮求、若此傳不虛、眾恨可言、今輒略問數十條事、冀有餘暇、一一爲釋、此雖非經中之大難、要欲取決於君耳、并報偈一章、日本端竟何從起、滅有無際、一微涉

動境成此、觀山勢、惑相更何求、觸理自生、滯因緣雖無主、開途非  
一世、時無悟宗匠、誰將握玄契、末問尙悠悠、相與期慕成、高僧傳六  
遺書通好、是摩流支

佛教之興、尤行上國、自分流已來、四百餘年、至於沙門律戒所關、  
尤多、頃有西域道士弗若多羅、是罽賓人、其諷十誦梵本、有羅什  
法師、通才博見、爲之傳譯、十誦之中、文始過半、多羅早喪、中途而  
寢、不得究竟大業、慨恨良深、傳聞仁者、齋此經自隨、甚欣所遇、冥  
運之來、豈人事而已邪、想弘道爲物、感時而勸、叩之有人、必情無  
所惜、若能爲律學之徒、畢此經本、開示梵行、洗其耳目、使始涉之  
流、不失無上之津、深懷勝業、俾日月彌朗、此則惠深德厚、人神同  
感矣、幸願垂懷、不乖往意、一二悉諸道人所具、高僧傳二  
荅桓玄書

大道淵玄、其理幽深、銜此高旨、實如來談、然貧道出家、便是方外

則字  
下脫

而大當  
作大而

之賓雖未踐古賢之德取其一往之志削除飭好落名求實若使  
幽真有在故當不謝於俗人外似不盡內若斷金可謂見形不及  
道哀哉哀哉帶索枕石華而不實管見之人不足羨矣雖復養素  
山林與柯木何異夫道在方寸假練形爲真卞和號慟於荆山患  
人不別菽也苦聞其名今見其人故莊周悲慨人生天地之間如  
白駒之過隙已此而尋孰得久停豈可不爲將來作資言學步邯  
鄲者新無功失其本質故使邯鄲人匍匐而歸百代之中有此一  
也豈混同曰通之貧道已乖世務形權於流俗欲於其中化未化  
者雖復沐浴踞傲奈疑結何一世之榮劇若電光聚則致離何足  
貪哉淺見之徒其惑哉可謂下士聞道而大笑之真可謂迷而不  
反也貧道形不出人才不應世是故毀其陋質被其割截之服理  
未能心冥玄化遠存大聖之制豈捨其本懷而酬高誨貧道年與  
時積所患未痊乃復曲重光慰感慶交至檀越信心幽當大法所

寄豈有一傷毀其本也將非波旬試嬖之言辭拙寡聞力酬高命  
蓋是不逆之懷耳

引明集十一

與桓玄書論料簡沙門

佛教陵遲穢雜日甚每一尋思憤慨盈懷常恐運出非意混然淪  
溺此所目夙宵歎懼忘寢與食者也見檀越澄清諸道人敬實應  
其本心失涇曰渭分則清濁殊流枉曰直正則不仁自遠推此而  
言符命既行必二理斯得然後令飾偽取容者自絕於假通之路  
信道懷真者無復有負俗之嫌如此則道世交與三寶復隆於茲  
矣貧道所目寄命江南欲託有道目存至業之隆替實由乎人植  
檀越當年則是貧道中興之運幽情所託已冥之在昔是日前後  
書疏輒曰憑寄爲先每尋告慰眷懷不忘但恐年與時乖不盡檀  
越盛隆之化耳今故諮白數條如別疏

經教所開凡有三科一者禪思入微二者諷味遺典三者興建福

觀業  
恒書

略

業三科誠異皆曰律行爲本檀越近制是大同於此是所不疑或有與福之人內不毀禁而迹非阿練若者或多誦經諷詠不絕而不能暢說義理者或年已宿長雖無三科可記而體性貞正不犯人非者凡如此輩皆是所疑今尋檀越所遣之例不堪問此而外物惶惑莫敢自寧故曰別白夫形跡易察而眞僞難辯自非遠鑒得之信難若是都邑沙門經檀越視聽者固無所疑若邊局遠司識不及遠則未達教旨或因符命濫及善人此最其深憂若所在執法之官意所未詳又時無宿望沙門可召求中得令送至大府召經高鑒者則於理爲弘想檀越神慮已得之於心直是貧道常近之情不能不及耳若有族姓子弟本非役門或世奉大法或弱而天悟欲棄俗入道求作沙門推例尋意似不塞其情塗然要須諮定使洗心向味者無復自疑之情昔外國諸王多參懷聖典亦有因時助弘大化扶危救弊信有自來矣檀越每期情古人故復

略敘所聞疏明集十二高僧傳六有節文

荅桓玄書

宜下脫受字

詳省別告及八座書問沙門所已不做王者意義在尊主崇上遠存名體微引老氏同王族於三大已資生運通之道故宜重其神器若推其本已尋其源咸稟氣於兩儀受形於父母則已生生通運之道爲弘資存日用之理爲人故不宜其德而遺其禮露其惠而廢其敬此檀越立意之所據貧道亦不異於高懷求之於佛教已尋沙門之道理則不然何者佛經所明凡有二科一者處俗弘教二者出家修道處俗則奉上之禮尊親之敬忠孝之義表於經文在三之訓彰乎聖典斯與王制同命有若符契此一條全是檀越所明理不容異也出家則是方外之賓迹絕於物其爲教也達患累緣於有身不存身已息患知生生由於稟化不順化已求宗求宗不由於順化故不重運通之資息患不自於存身故不貴厚

自當作由

生之益此理之與世乖道之與俗反者也是故凡在出家皆隱居  
曰求其志變俗曰達其道變俗服章不得與世典同禮隱居則宜  
高尙其迹夫然故能拯溺族於沈流拔幽根於重劫遠通三乘之  
津廣開天人之路是故內乖天屬之重而不違其孝外闕奉主之  
恭而不失其敬若斯人者自誓始於落簪立志成於暮歲如令一  
夫全德則道洽六親澤流天下雖不處王侯之位固已協契皇極  
大庇生民矣如此豈坐受其德虛霑其惠與夫尸祿之賢同其素  
餐者哉檀越頃者已有其服而無其人故澄清簡練容而不難此  
命既宜皆人百其誠遂之彌深非言所喻若復開出處之迹曰弘  
方外之道則虛襟者挹其遺風激流者味其餘津矣若澄簡之後  
猶不允情其中或真偽相冒涇渭未分則可曰道廢人固不應曰  
人廢道曰道廢人則宜去其服曰人廢道則宜存其禮禮存則制  
教之旨可尋跡廢則逸志之歡莫由何曰明其然夫沙門服章法

用雖非六代之興自是道家之殊俗表之名器名器相涉則事乖其本事乖其本則禮失其用是故愛夫禮者必不虧其名器得之不可虧亦有白來矣夫遠遵古典者猶存告朔之餼羊餼羊猶可曰存禮豈況如來之法服邪推此而言雖無其道必宜存其禮禮存則法可弘法可弘則道可尋此古今所同不易之大法也又袈裟非朝宗之服鉢盂非廊廟之器軍國異容戎華不雜剔髮毀形之人忽廁諸夏之禮則是異類相涉之像亦竊所未安檀越奇謁挺於弱年風流邁於季俗猶參究時賢曰求其中此而推之必不曰人廢言貧道西垂之年假日月以待盡情之所惜豈存一己苟恪所執蓋欲令三寶中興於命世之運明德流芳於百代之下耳若一旦行此佛教長淪如來大法於茲泯滅天人感歎道俗革心矣貧道幽誠所期復將安寄緣眷愚之隆故坦其所懷執筆悲懣不覺涕泗橫流矣

沙門不拜俗事一



夫稱沙門者何邪。謂能發矇俗之幽昏。啟化表之玄路。方將已兼忘之道。與天下同往。使希高者挹其遺風。漱流者味其餘津。若然雖大業未就。觀其超步之迹。所悟固已宏矣。又袈裟非朝宗之服。鉢盂非廊廡之器。沙門塵外之人。不應致敬王者。高僧傳六 案此即前篇而文句多異

與晉安帝書

釋慧遠頓首。陽月。和暖。願御膳順宜。貧道先嬰重疾。年衰益甚。猥蒙慈詔。曲垂光慰。感懼之深。實百於懷。幸遇慶會。而形不自運。此情此慨。良無已喻。高僧傳六

荅盧循書

損餉六種。深抱情至。益智乃是一方異味。即於僧中行之。魏文類

七御覽九百七十二

沙門不敬王者論五篇并序

晉成康之世車騎將軍庾冰疑諸沙門抗禮萬乘所明理何驟騎  
有荅至元興中太尉桓公亦同此義謂庾言之未盡與八座書云  
佛之爲化雖謫已茫茫惟乎視聽之外已敬爲本此出處不異蓋  
所期者殊非敬恭宜廢也老子同王侯於三大原其所重皆在於  
貴生通運豈獨已聖人在位而比稱二儀哉將已天地之大德曰  
生通生理物存乎王者故尊其神器而體實唯隆豈是虛相崇重  
義存弘御而已沙門之所已生生貴國存亦日用於理命豈有受  
其德而遺其禮沾其惠而廢其敬哉於時朝士名賢荅者甚眾雖  
言未悟時並互有其美徒成盡所懷而理縊於情遂令無上道服  
毀於塵俗亮到之心屈乎人事悲夫斯乃交喪之所由千載之否  
運深懼大法之將淪感前事之不忘故著論五篇究敘微意豈曰  
淵壑之待晨露蓋是伸其罔極亦庶後之君子崇敬佛教者式詳  
覽焉

在家一

原夫佛教所明大要。已出家爲異。出家之人。凡有四科。其弘教通物。則功侔帝王。化兼治道。至於感俗悟時。亦無世不有。但所遇有行藏。故已廢興爲隱顯耳。其中可得論者。請略而言之。在家奉法。則是順化之民情。未變俗跡。同方內。故有天屬之愛。奉主之禮。禮敬有本。遂因之而成教。本其所因。則功由在昔。是故因親已。敎愛使民。知其有自然之恩。因嚴已。敎敬使民。知其有自然之重。二者之來。實由冥應。應不在今。則宜尋其本。故已罪對爲刑罰。使懼而後慎。已天堂爲爵賞。使悅而後勳。此皆卽其影響之報。而明於敎。已因順爲通。而不革其自然也。何者。夫厚身存生。已。有封爲藩累根深固。存我未忘。方將已情。欲爲苑囿。聲色爲遊觀。耽湎世樂。不能自勉。而特出。是故敎之所檢。已此爲涯。而不明其外耳。其外未明。則大同於順化。故不可受其德。而遺其禮。沾其惠。而廢其敬。是

故悅釋迦之風者。輒先奉親而啟君。變俗投簪者。必待命而順動。若君親有疑。則退求其志。已俟同悟。斯乃佛教之所已重。資生助王化於治道者也。論者立言之旨。貌有所同。攸位夫內外之分。已明在三之志。略敘經意。宣寄所懷。

## 出家二

出家則是方外之賓。跡絕於物。其爲教也。達患累緣於有身。不存身。已息患。知生生由於稟化。不順化。已求宗。求宗不由於順化。則不重運通之資。息患不由於存身。而不貴厚生之益。此理之與形乖。道之與俗反者也。若斯人者。自誓始於落簪。立志形乎變服。是故凡在出家。皆遷世。已求其志。變俗。已達其道。變俗則服章不得。與世典同。遷世則宜高尙其跡。夫然者。故能拯溺俗於沈流。拔玄根於重劫。遠通三乘之津。廣開天人之路。如令一夫全德。則道洽六親。澤流天下。雖不處王侯之位。亦已協契皇極。在宥生民矣。

是故內乖天屬之重而不違其孝外闕奉主之恭而不失其敬從此而觀故知超化表已尋宗則理深而義篤昭泰息已語仁則功末而惠淺若然者雖將而冥山而旋步猶或恥聞其風豈況與夫順化之民尸祿之賢同其孝敬者哉

求宗不順化三

問曰尋夫老氏之意天地已得一爲大王侯已體順爲尊得一故爲萬化之本體順故有運通之功然則明宗必存乎體極體極必由於順化是故先賢已爲美談眾論所不能異異夫眾論者則義無所取而云不順化何邪答曰凡在有方同稟生於大化雖羣品萬殊精麤異貫統極而言唯有靈與無靈耳有靈則有情於化無靈則無情於化無情於化化畢而生盡生不由情故形朽而化滅有情於化感物而動動必已情故其生不絕其生不絕則其化彌廣而形彌枯情彌滯而累彌深其爲患也焉可勝言哉是故經稱

泥洹不變。曰化盡爲宅。三界流動。曰罪苦爲場。化盡則因緣永息。流動則受苦無窮。何曰明其然。夫生曰形爲桎梏。而生由化有。化曰情感。則神滯其本。而智昏其照。介然有卦。則所存唯己。所涉唯動。於是靈轡失御。生塗日開。方隨貪愛於長流。豈一受而已哉。是故反本求宗者。不曰生累其神。超落塵封者。不曰情累其生。不曰情累其生。則生可滅。不曰生累其神。則神可冥。冥神絕境。故謂之泥洹。泥洹之名。豈虛稱也哉。請推而實之。天地雖曰生生爲大。而未能令生者不死。王侯雖曰存存爲功。而未能令存者無患。是故前論云。達患累緣於有身。不存身。曰息患。知生生由於稟化。不順化。曰求宗。義存於此。義存於此。斯沙門之所曰抗禮萬乘。高尚其事。不爵王侯。而沾其惠者也。

體極不兼應四

問曰。歷觀前史上皇已來。在位居宗者。未始異其原本。本不可二。

見當世

咸當世

是故百代同典咸一其統所謂唯天爲大唯堯則之如此則非智有所不照自無外可照非理有所不盡自無理可盡曰此而推視聽之外廓無所寄理無所寄則宗極可明今諸沙門不悟文表之意而惑教表之文其爲謬也固已甚矣若復顯然有驗此乃希世之聞荅曰夫幽宗曠邈神道精微可曰理尋難曰事詰既涉乎教則曰因時爲檢雖應世之見優劣萬差至於曲成在用感卽民心而通其分分至則止其智之所不知而不關其外者也若然則非體極者之所不兼兼之者不可竝御耳是曰古之語大道者五變而形名可舉九變而賞罰可言此但方內之階差而猶不可頓設況其外者乎請復推而廣之曰遠其旨六合之外存而不論者非不可論論之或乘六合之內論而不辯者非不可辯辯之惑疑春秋經世先王之志辯而不議者非不可議議之者或亂此三者皆卽其身耳目之所不至曰爲關鍵而不關視聽之外者也因此而

求聖人之意則內外之道可合而明矣。常曰爲道法之與名教如  
來之與堯孔。發致雖殊。潛相影響。出處誠異。終期則同。詳而辯之。  
指歸可見。理或有先合而後乖。有先乖而後合。先合而後乖者。諸  
佛如來則其人也。先乖而後合者。歷代君王未體極之主斯其流  
也。何曰明之。經云。佛有自然神妙之法。化物曰權。廣隨所入。或爲  
靈仙。轉輪聖帝。或爲卿相國師道士。若此之倫。在所變現。諸王君  
子莫知爲誰。此所謂合而後乖者也。或有始創大業而功化未就。  
跡有參差。故所受不同。或期功於身後。或顯應於當年。聖王則之  
而成教者。亦不可稱算。雖抑引無方。必歸塗有會。此所謂乖而後  
合者也。若令乖而後合。則擬步通塗者。必不自崖於一揆。若令先  
合而後乖。則釋迦之與堯孔。發致不殊。斷可知矣。是故自乖而求  
其合。則知理會之必同。自合而求其乖。則悟體極之多方。但見形  
者之所不兼。故惑眾塗而駭其異耳。因茲而觀天地之道。功盡於



運化帝王之德理極於順通故雖曰道殊所歸一也不兼應者物不能兼受也已上四句從高僧傳補若已對夫獨絕之教不變之宗固不得同年而語其優劣亦已明矣

形盡神不滅五

問曰論旨已化盡爲至極故造極者必達化而求宗求宗不由於順化是已引歷代君王使同之佛教令體極之至已權居統此雅論之所託自必於大通者也求之實當理則不然何者夫稟氣極於一生生盡則消液而同無神雖妙物故是陰陽之所化耳既化而爲生又化而爲死既聚而爲始又散而爲終因此而推因知神形俱化原無異統精麤一氣如終同宅宅全則氣聚而有靈宅毀則氣散而照滅散則反所受於天本滅則復歸於無物反覆終窮皆自然之數耳孰爲之哉若令本異則異氣數合合則同化亦爲神之處形猶火之在木其生必存其毀必滅形離則神散而罔寄

木朽則火寂而靡託理之然矣。假使同異之分昧而難明，自無之說必存乎聚散。聚散氣變之總名，萬化之生滅。故莊子曰：人之生氣之聚，聚則爲生，散則爲死。若使生爲彼，彼爲吾，又何患？古之善言道者，必有自得之。若果然邪？至理極於一生，生盡不化，義可尋也。荅曰：夫神者何邪？精極而爲靈者也。精極則非卦象之所圖，故聖人曰：妙物而爲言，雖有上智，猶不能定其體狀，窮其幽致而談者，曰：常識生疑，多同自亂，其爲誣也亦已深矣。將欲言之，是乃言夫不可言。今於不可言之中，復相與而依俛，神也者，圓應無生，妙盡無名，感物而動，假數而行，感物而非物，故物化而不滅，假數而非數，故數盡而不窮。有情則可曰物感，有識則可曰數求，數有精麤，故其性各異，智有明闇，故其照不同。推此而論，則知化曰情感，神曰化傳，情爲化之母，神爲情之根，情有會物之道，神有冥移之功。但悟徹者反本，惑即者逐物耳。古之論道者，亦未有所同，請引

而明之。莊子發玄音於大宗曰：大塊勞我曰生，息我曰死。又曰：生爲人羈，死爲反眞。此所謂知生爲大患，曰無生爲反本者也。文子稱黃帝之言曰：形有靡而神不化，曰不化乘化其變無窮。莊子亦云：特犯人之形，而猶喜若人之形，萬化而未始有極。此所謂知生不盡於一化，方逐物而不反者也。二子之論雖未究其實，亦嘗傍宗而有聞焉。論者不尋無方生死之說，而惑聚散於一化，不思神道有妙物之靈，而謂精麤同盡，不亦悲乎？火木之喻，原自聖典，失其流統，故幽興莫尋。微言遂淪於常談，令談者資之，曰成疑。向使時無悟宗之匠，則不知有先覺之明，其傳之功沒世靡聞。何者？夫情數相感，其化無端，因緣密構，潛相傳寫，自非達觀，孰識其變。自非達觀，孰識其會。請爲論者驗之：曰實火之傳於薪，猶神之傳於形。火之傳異薪，猶神之傳異形。前薪非後薪，則知指薪之術，故前形非後形，則悟情數之感。深惑者見形朽於一生，便曰謂神情俱

喪猶觀火窮於一本謂終期都盡耳此由從養生之談非遠尋其類者也就如來論假令神形俱化始自天本愚智賢生同稟所受間所受者爲受之於形邪爲受之於神邪若受之於形凡在有形皆化而爲神矣若受之於神是已神傳神則丹朱與帝堯齊聖重華與瞽瞍等靈其可然乎其可然乎如其不可固知冥緣之構著於在昔明闇之分定於形初雖靈均善運猶不能變性之自然況降茲已還乎驗之曰理則微言而有微効之曰事可無惑於大道案高僧傳作五曰形盡神不滅謂識神馳騁隨行東西也此是論之大意是沙門得全方外之迹矣今論無此數語蓋弘明集有刪節也

論成後有退居之賓步朗月而宵遊相與共集法堂因而問曰敬尋雅論大歸可見殆無所間一日試重研究蓋所未盡亦少許虛耳意曰爲妙門德式是變俗之殊制道家之名器施於君親固宜略於形敬今所疑者謂甫創難就之業遠期化表之功潛澤無現

法之効來報玄而未應乃今王公獻供信士屈體得無坐受其德  
陷乎早計之累虛沾其惠貽夫素餐之譏耶主人良久乃應曰請  
爲諸賢近取其類有人於此奉宣時命遠通殊方九譯之俗問主  
者曰當贊曰振錫曰舉服不答曰然主人曰類可尋矣夫稱沙  
門者何邪謂其發蒙俗之幽昏啟化表之玄路方將曰兼忘之道  
與天下同往使希高者挹其遺風漱流者味其餘津若然雖大業  
未就觀其超步之跡所悟固已弘矣然則運通之功賢存之益尙  
未酬其始誓之心況答三業之勞乎又斯人者形雖有待情無近  
寄視夫四事之供若蟻蚊之過乎其前者耳濡沫之惠復焉足語  
哉眾賓於是始悟冥途曰開轍爲功息心曰淨畢爲道乃欣然怡  
襟詠言而退晉元興三年歲次閏逢於時天子蒙塵人百其憂凡  
我同志僉懷綴旒之歎故因述斯論焉

皇明集五沙門不拜俗  
又略見高僧傳六

賜進士出身二品銜廣東等處提刑按察使司按察使兼管驛傳事務黃岡王毓藻校刊

全晉文卷一百六十一終

全晉文卷一百六十一

十三